

# **INTERVENSAUN HUSI SUA EXELÉNSIA PRIMEIRU-MINISTRU, TAUR MATAN RUAK IHA SESAUN SOLENE ABERTURA BA SORUMUTUK PARSEIRU DEZENVOLVIMENTU TIMOR-LESTE NIAN (TLDPM) TINAN 2019**

**TEMA: “HAMETIN LIUTÁN KOORDENASAUN KONA-BA FINANSIAMENTU BA DEZENVOLVIMENTU”**

*Auditóriu “Xanana Gusmão”, Torre Ministériu Finansas iha Ai-tarak laran, Dili, lora 4 fulan-jullu tinan 2019*

Sua Exelénsia, Prezidente Parlamentu Nasionál, **Senhor Arão Noé de Jesus da Costa Amaral**;

Sua Exelénsia, Senhor Prezidente Tribunál Rekursu, **Senhor Deolindo dos Santos**;

Exelénsias Senhora no Senhor Embaixador sira, Membru Korpu Diplomátiku sira no Reprerzentante sira husi Parseiru Dezenvolvimentu Timor-Leste nian;

**Distintu Konvidadu sira;**

**Senhora no Senhor sira:**

Sai nu'udar onra boot ida mai ha'u atubele halo abertura ba forum importante ida ne'e ba diálogo no koordinasaun nivel aas entre Governu Timor-Leste no Parseiru Dezenvolvimentu nian sira, ne'ebé tinan ida-ne'e dedikadu ba tema “*hametin liután Koordinasaun kona-ba Finansiamentu ba Dezenvolvimentu*”.

hirak ne'ebé hala'o tuituir malu no inserteza polítika, ho haksolok tebes maka Governu Konstitusionál VIII hahú fila-fali diálogo polítiku ida-ne'e, hodi aproveita oportunidade ne'ebé forum ida-ne'e fó, atu partilla ami-nia vizaun komún hodi dezenvolve Timor-Leste ida-ne'ebé moris di'ak liután.

Tanba ne'e, ha'u hakarak, hodi Governu Konstitusionál VIII nia naran, no ha'u nia naran rasik, hato'o ha'u-nia boas-vindas ba partisipante hotu-hotu, konvidadu no membru comunidade internasionál no korpu diplomátiku ne'ebé hetan akreditasaun iha ami-nia país.

Ha'u hakarak hato'o mós ba povu amigu hotu-hotu ne'ebé reprezentadu iha ne'e, iha nivel bilaterál no multilaterál, ami-nia kumprimentus no ami-nia kordiál saudasaun, iha tinan ida-ne'e, iha ne'ebé ami selebra Aniversáriu Referendu no Misaun INTERFET nian ba dala 20, ne'ebé marka ami-nia prosesu Restauraun Independénsia no prosesu Konstrusaun Estadu Direitu Demokrátiku, livre no soberanu.

Hahú husi lora 30 fulan-agostu tinan 2019, kompleta ona tinan 20 husi konkretizasaun ba mehi kolektivu ida-ne'e, ne'ebé halibur organizasaun hotu-hotu husi sosiedade sivíl nasaun Timor nian, estabese dalan ida ba país, estabilidade, dezenvolvimentu no progresu.

Dalan ida-ne'ebé mak ami la liu mesak, maibé ami liu hamutuk ho comunidade no organizasaun internasionál sira, ho lideransa Nasoins Unidas nian no ho tulun husi Estadu-membru sira rasik.

Dalan ida-ne'ebé halo ami sente orgullu tebes tanba rezultadu hirak ne'ebé hetan ona iha dékada rua ikus ne'e, liuliu:

- Ho ita-boot sira-nia tulun ami konsege ona promove la'ós de'it rekonsiliaun interna, ho ami-nia maun alin timoroan sira, maibé mós rekonsiliaun esterna, ho ami-nia viziñu sira, hodi hakat liu hanoin sira uluk nian, bazeia ba prinsípiu sira katak “*buat hotu ne'ebé la ajuda ita atu hakat ba oin, ita tenke husik no haluha tiha*”
- Ami bele hetan ona pás ida ne'ebé dura kleur, kontinuada no sustentada tuir nia tempu, no pás ida ne'ebé metin nafatin no tanba ne'e ami bele hakat liu momentu inserteza no krize

nian;

- Ami hetan susesu di'ak iha dezenvolvimentu institusionál, hodi kria órgaun soberania nian sira ne'ebé ohin loron regula ami-nia demokrasia, ho apoiu husi administrasaun públika ida ne'ebé mak besik no atua maka'as liután.
- Ami mós konsege implementa sistema administrasaun justisa nian ida, ne'ebé imparsiál, justu, ekuitativu no independente, ne'ebé akompaña ho mekanizmu atu halo monitorizasaun, avaliasaun no kontrolu ba atividade sira Governu nian, ho ninia índise responsabilidade no transparénsia nian ne'ebé aas ba beibeik.
- Ami implementa sistema nasional ida ba ensinu no edukasaun, universal no la selu, hodi demokratiza asesu ba koñesimentu, ba formasaun kontínua, ba kapasitasaun no ba abilitasaun rekursus umanus;
- Ami halo ona progresu barak iha índise sira kona-ba moris-di'ak, ho implementasaun sistema seguransa sosial nian ida ne'ebé asesivel ba ema hirak ne'ebé mukit, vulneravel no la hetan atensaun, akompaña ho investimentu sira iha eletrisidade, bee, abitasaun no infraestrutura sira, ne'ebé kontribui la'ós de'it atu harii família sira ne'ebé saudavel no produtiva liu, maibé mós ba mobilidade no kreximentu ekonómiku;
- Ami mós hatene define prioridade sira no hili área hirak ne'ebé konsidera hanesan área ne'ebé importante no urjente liu, hodi adota Planu Estratéjiku Dezenvolvimentu nian, ba período tinan 2011 to'o 2030, la sees husi kompromisu hirak ne'ebé asume ona iha Objektivu sira husi Dezenvolvimentu Sustentavel hamutuk 17.

Nune'e ami celebra susesu ida ne'ebé koletivu duni, ne'ebé hanoín fila-fali ba sorumutuk dahuluk forum parseiru dezenvolvimentu nian ida ne'e, ne'ebé hala'o iha Tókiu iha tinan 1999, marka mós prezensa konstante, kontinuada no firme, husi militar, polisia, ajénsia internasionál sira, profesionál sira, peritu, tékniku no especialista sira, ne'ebé iha tinan barak nia laran tulun hasai Timor-Leste husi lista nasaun frajil no pós-konflitu nian.

Ami agradese tebes ba ita-boot sira-nia konfiansa no apoiu ne'ebé ita-boot sira fó nafatin ba dezenvolvimentu Nasaun ida, ne'ebé ita hotu hakarak atu moris-di'ak, atuante no kompetitivu liután.

### **Senhora no senhor sira,**

#### **Distintu konvidadu sira,**

Liutiha tinan 17 (sanulu resin hitu) restaurasaun independénsia, ami fiar katak ami to'o ona momentu adekuaudu atu hametin ami-nia parseria estratéjika sira ba kurtu no médiu prazu, hodi hadi'a forma koordenasaun nian no haforsa métodu finansiamentu ba projetu komún sira, ba qualidade moris nian ida ne'ebé di'ak liu ba Povu Timoroan.

Iha momentu ida ne'ebé ami celebra aniversáriu dahuluk Governu Konstitusionál VIII nian, ami hakarak aproveita oportunidade ne'ebé forum ida-ne'e fó, atu apresenta ba ami-nia parseiru sira, liña orientasaun boot sira ba tinan hirak oin mai no rezumu ida husi objetivu prinsipál sira no prioridade sira ne'ebé mak atu atinje to'o mandatu ne'e nia rohan.

Prioridade hirak ne'ebé buka atu konsentra liu ba investimentu iha projetu foun sira no atu hetan rezultadu hirak ne'ebé di'ak liután iha indikadór no kompromisu sira ne'ebé asume ona ba ami-nia povu, iha Planu Estratéjiku Dezenvolvimentu Nasionál nian (PEDN) no iha Roteiru ba Implementasaun Objektivu sira husi Dezenvolvimentu Sustentável (ODS), ne'ebé ninia rezultadu mak ohin apresenta mós, iha relatóriu kona-ba Revizaun Nasionál Voluntária.

Kompromisu hirak ne'ebé asume ona atu hadi'a:

- moris-di'ak sosial, protesau sosial no sidadania;
- iinvestimentu iha ekonomia no iha konsolidasaun finansas públicas;
- konetividade nasional;
- konsolidasaun no reforsu ba defeza, seguransa no relasaun esterna sira;
- konsolidasaun no reforsu ba justisa, demokrasia no direitus umanus.

Melloria hirak ne'ebé hakarak hetan aumentu sustentadu husi rendimentu sira, hodi estimula iniciativa privada, diversifikasaun ekonomia no aproveitamentu di'ak husi biban oioin dezenvolvimentu nian, husi baze no husi setór ekonómiku no produtivu sira nasaun nian.

Medida sira ne'ebé hakarak hetan aumentu sustentadu husi rendimentu sira, hodi estimula iniciativa privada, diversifikasaun ekonomia no aproveitamentu di'ak husi biban oioin dezenvolvimentu nian, husi baze no husi setór ekonómiku no produtivu sira nasaun nian.

Investimentu iha infraestrutura estratéjika sira, ne'ebé bele promove kriasaun empregu no hamosu

setór privadu ida-ne'ebé forte, ho apoiu husi rekursus umanus no instituisaun públika sira, ne'ebé iha kapasidade, abilidade no besik liután ba sidadaun no comunidade sira.

Opsaun nesésaria sira-ne'e, ne'ebé mak foka liu ba dezafiu prinsipál no problema sira, ne'ebé afeta ba distribuisaun ekuitativa husi rikusoin nasionál, no ne'ebé difikulta koezaun no ekilíbrui territoríal, opsaun nesésaria sira ne'e sei bele hatán, loloos, *ba país rural ne'ebé maka haluha tinan naruk no presau ne'ebé la iha kontrolu husi país urbanu.*

Ami fiar katak ho *Política Ajuda Pública ba Desenvolvimento (APD)* foun, ne'ebé ohin ita lansa, hamutuk ho rezultadu sira husi *Avaliasaun kona-ba Finansiamentu ba Desenvolvimento (DFA)*, ita iha sei bele fiar katak ita iha pozisaun loloos atu define senáriu envolvimentu, ne'ebé di'ak liu, hodi hetan proveitu boot husi asisténsia esterna nian ba desenvolvimentu, ne'ebé tau ona iha ita-nia dispozisaun tinan ikus nian ne'e, esforsu finanseiru ida ne'ebé, iha média, representa besik USD 201 (millaun atus rua ida) husi investimentu ba tinan-tinan.

Volume husi ajuda pública anuál ida-ne'e, maske iha nivel ne'ebé ki'ik liu iha tinan hirak ikus ne'e, kontinua boot liu nafatin husi volume reseita fiskál nian sira ne'ebé rai iha nasaun ne'e tinan-tinan.

Atu mobiliza fonte adisionál sira finansiamentu nian no consege utilizaun ne'ebé di'ak liután husi rekursu finanseiru sira ne'ebé iha ona ho forma efikás, eficiente, transparente, responsavel liu, atu evita duplikasaun sira, despeza supérflua ka deznesésaria sira, ne'ebé enkuadra ho planu, objetivu no rezultadu sira ne'ebé atu atinje, kontinua sai hanesan ita-nia preokupasaun no prioridade ida mós, ne'ebé hakarak hametin no haforsa, hamutuk ho parseiru no doador sira, sentimentu konfiansa nian ba Governu no ba instituisaun Estadu nian sira rasik.

**Senhora no Senhor sira,**

**Distintu konvidadu sira**

Ha'u hanoin katak ita-nia Parseiru sira Desenvolvimento nian bele iha preokupasaun lejítima sira kona-ba alkanse no linha jerál sira husi política ne'e, maibé ha'u fiar katak forum ida-ne'e sai nu'udar fatin ida ne'ebé adekuaudu liu atu fahe dokumentu sira, debate kona-ba ninia aspetu no implikasaun hotu, tanba ha'u hatene katak ita hakarak de'it, halo diálogu no koordenasaun sai di'ak no efetivu liután, liuliu entre Governu no parseiru sira Desenvolvimento nian, hodi fasilita mós, fluksu ajuda naun-govermentál sira, ba setór privadu no organizasaun sira sociedade sivíl nian, naran katak apoiu sira labele mai de'it husi Estadu.

Ha'u garante ba imi, no husi ne'e, katak dokumentu ho política foun ne'e, maka fleksível, tanba ne'e Governu, ne'ebé representa durante sorumutuk ne'e, husi Sua Exelénsia Senhora Ministra Finansas ein ezersísiu, nakloke nafatin ba diskusaun kona-ba ninia konteúdu no ami prevee nia implementasaun tuir faze, hodi respeita ba akordu sira finansiamentu nian ne'ebé celebra ona, no la perturba ritmu normál dezembolsu nian ba implementasaun programa no projetu sira ne'ebé la'o hela.

Iha tempu hanesan, Governu, liuhusi Ministériu Finansas no Ministériu Negósius Estranjeirus no Kooperasaun, sei halo buat hotu atu haforsa no hadi'a mekanizmu institusionál atuál sira koordenasaun nian, hodi hakmaan liután entendimentu no prosedimentu sira, ho hanoin atu mantein foku iha esforsu sira ba desenvolvimentu no salvaguarda koerénsia husi política no finansiamentu sira.

Ho liafuan sira-ne'e, ha'u repete dala ida tan apresiasaun boot Governu nian ba parseria sira ne'ebé fó rezultadu di'ak, ne'ebé ita consege promove ho Parseiru Desenvolvimento nian hotu-hotu no ha'u fó aten-barani ba ita-boot sira atu ita hamutuk nafatin, fó liman ba malu, atu kontinua ho serbisu ne'ebé la'o daudaun, ne'ebé sei lori kondisaun sira moris nian ne'ebé di'ak liu ba timoroan hotu no ba sidadaun hotu ne'ebé hela iha rai-ne'e.

Ha'u fiar katak senhor Embaixador sira, Membro sira husi Korpu Diplomátiku no Representante sira hosi Organizasaun Internasionál sira, sei lori mensajen ida-ne'e ba imi-nia Governu no Instituisaun Multilaterál sira.

Ha'u hakotu hodi hato'o ha'u-nia saudasaun fraterna dala ida tan ba ita-hotu ne'ebé mai iha ne'e, no dezeja ba imi-hotu saúde di'ak no ksolok iha imi-nia moris pesoál, profesionál no familiár.

Na'i Maromak haraik bensaun, saúde no forsa mai ita-hotu!

**Obrigadu barak!**